

आकाशवाणी

खास-खास खबरां:-

1. राष्ट्रपति द्रोपदी मुरमू होर लोक परीक्षा अनुचित साधन निवारण संशोधन विधेयक 2026 गी मंजूरी दिती।
2. प्रधानमंत्री नरेन्द्र मोदी होरें आखेआ जे गाली देना त नफरत कोई बहादुरी आहली गल्ल नैई ऐ ते नां गै इंदे कन्नै कुसै मामले दा हल नैई होई सकदा।
3. प्रधानमंत्री नरेन्द्र मोदी होर अज्ज आंध्र-प्रदेश ते कर्नाटक दे इक दिन दे दौरे पर रौहडन।
4. भारत नै आखेआ ऐ जे पाकिस्तान दे नजैज कब्जे आहले जम्मू-कश्मीर च होआरदे तथा-कथित चुनां पाकिस्तानी सत्ता खलाफ जनता दी सख्त नराजगी दा प्रमाण ऐ।
5. विदेश मंत्री डाक्टर एस. जयशंकर होरें कल संजा ईरान दे विदेश मंत्री अब्बास अराघगी हुंदे कन्नै फोन पर गल्ल करिए पश्चिम एशिया क्षेत्र च जारी तनाव पर चिंता जाहिर कीती।
6. ते भारत नै ग्लासगो च चला रदे राष्ट्रमंडल खेड़ें च कल शानदार प्रदर्शन कीता।

<><><><><><>

Prez Assent-Public Exam Bill

राष्ट्रपति द्रोपदी मुरमू होरें लोक परीक्षा अनुचित साधन निवारण संशोधन विधेयक 2026 गी मंजूरी देई दिती ऐ। एह विधेयक वीरवारें संसद आस्सेआ मंजूर कीता गेआ। एदा मकसद सख्त सजा दा प्रावधान करने ते फास्ट ट्रैक अदालत दी स्थापना करिए लोक परीक्षाएं च अनुचित गतिविधियें पर रोक लाना ऐ।

<><><><><><>

PM –Hatred

प्रधानमंत्री नरेन्द्र मोदी होरे आखेआ ऐ जे गाली देना ते नफरत कोई बहादुरी आहली गल्ल नैई ऐ ते नां गै इन्दे'नै कुसै मसले दा हल होई सकदा ऐ। उ'नें प्रदर्शनें दौरान गाली देने आहलें ते अभद्र बवहार करने आहलें नौजवानें प्रति क्यास ते हमदर्दी प्रगट करने दी अपील करदे होई आखेआ ऐ कि राष्ट्र निर्माण ते राष्ट्री हित गी ध्यानै च रखदे होई ऐसे भटके दे नौजवानें गी कनूनै तैहत सजा दे बजाए उनें'गी स्हेई बत दस्सी जानी लोड़चदी। इक सोशल मीडिया संदेश च मोदी होरें आखेआ जे राजधानी दे जंतर-मंतर पर होई दी हाल दी घटनाए दौरान जेहड़ा उन्दे ते उन्दी माता हुंदे खलाफ अपशब्दें दा इस्तमाल कीता गेआ अजें कि एह कोई खरी गल्ल नैई ऐ। उ'नें आखेआ जे देश ते दुनिया ने इस घटना गी दिक्खेआ। उ'नें आखेआ कि इस चाली दे बवहार पर समाज दा गुस्सा पूरी चाल्ली जायज बी ऐ पर बचपन गलतियां करने-मता किश सिक्खने ते गलतिएं गी सधेरने दा बी दौर होंदा ऐ। मोदी होरें आखेआ कि ऐसे गुमराह बच्चें ते नौजवानें गी अदालती कारवाई च घसीटनें जां समाजी उत्पीड़न दा शकार बनाने दे बचाए-समाज गी उनें'गी अपनाना लोड़चदा ते उनें'गी स्हेई दी मत ते बत

दस्सनी लोडचदी। उ'नें आखेआ जे ओ इनें बच्चें गी माफ करना चाहंदे न तां'जे उन्दा स्हेई मार्ग-दर्शन होई सकै।

<><><><><><>

PM –AP Visit

प्रधानमंत्री नरेन्द्र मोदी होर अज्ज आंध्र-प्रदेश ते कर्नाटक दे इक-दिने दे दौरे पर रौहगंन। मोदी होर पैहले आंध्र-प्रदेश च विजयनगरम जिले दे भोगपुरम च कोई 18 जहार करोड़ रपे दिएं बक्ख-बक्ख विकास परियोजनाएं चा किश दा उदघाटन करगंन ते किश दा नींह पत्थर रखगंन। प्रधानमंत्री होरें भोगपुरम स्थित अल्लूरी सीताराम राजू अंतराष्ट्रीय ब्हाई अड्डे दा उदघाटन करडन। इस नमें ग्रीन फील्ड ब्हाई अड्डे गी PPP यानी सार्वजनिक ते निजी सांझ-भ्याली कन्नै 5 जहार 600 करोड़ रपे कोला मती लागत कन्नै तयार कीता गेआ ऐ। एह ब्हाई अड्डा आंध्र-प्रदेश च सैलसफा बपार-निवेश ते रोजगार सृजन दे कन्नो-कन्नी ब्हाई सम्पर्क गी बी मजबूती देग। मोदी होर विशाखापत्तनम च 460 करोड़ रपे कोला मती दी लागत कन्नै तयार कीती जा'रदी A.S.I.P सेमी-कंडक्टर मिशन तैहत मंजूर सेमीकंडक्टर परियोजना दा बी नींह पत्थर रखगंन। आंध्रप्रदेश दे बाद मोदी होर कर्नाटक दे मैसूर पुज्जगंन जित्थे ओह स्वामी विवेकानंद संस्कृति ते युवा केन्द्र “विवेक स्मारक” दा उदघाटन करडन-जेहदा निर्माण 1892 च स्वामी विवेकानंद हुंदे ऐतिहासिक मैसूर दौरे दे चेते च बनाया गेदा ऐ।

<><><><><><>

PM-UK PM

प्रधानमंत्री नरेन्द्र मोदी होरें ब्रिटेन दे प्रधानमंत्री एंडी बर्नहैम हुंदे कन्नै गल्ल करिए उनें'गी ओहदा संभालने पर मुबारकबाद दिती। सोशल मीडिया दी इक पोस्ट च मोदी होरें दस्सेआ जे गल्लबात दौरान दौनें नेताएं प्रोद्योगिकी- नमिएं काहडे- रक्षा- सुरक्षा- स्वच्छ ऊर्जा- शिक्षा ते आपसी सरबंधें जनेह क्षेत्रें च मिलिए कम्म करने ते भारत- ब्रिटेन व्यापक रणनीतिक सांझेदारी गी नमीं ऊंचाई तगर लेई जाने पर राजी होए न। उनें आखेआ जे दवै मुख्य हाल च गै लागू होए दे भारत-ब्रिटेन व्यापक आर्थिक ते बपार समझौते आस्सेआ बपार ते निवेश दे मौके दा पूरा लाह ठोआने आस्तै मिलिए कम्म करडन।

<><><><><><>

India –PoJK Elections

भारत नै आखेआ जे पाकिस्तान दे नजैज कब्जे आहले जम्मू-कश्मीर च होआ'रदे तथा- कथित चुनां पाकिस्तानी सत्ता खिलाफ जनता दी सख्त नराज़गी दा प्रमाण न। नमीं दिल्ली च कल संवाददाताएं गी जानकारी दिंदे होई विदेश मंत्रालय दे प्रवक्ता रणधीर जयसवाल होरें आखेआ जे PoJK च शांतिपूर्ण प्रदर्शन करा'रदे लोकें पर पाकिस्तान लगातार दमन करा रदा ऐ। उ'नें आखेआ जे PoJK दे लोकें अंतराष्ट्रीय संगठनें थमां इनें घटनाएं दी स्वतंत्र जांच दी मंग कीती ऐ। भारत नै बी अंतराष्ट्रीय समुदाय थमां पाकिस्तान दी कारवाई दी जांच करने ते उसी जवाबदेह ठहराने दा आग्रह कीता ऐ।

<><><><><><>

Amit Shah-Pune

गृह ते सहकारिता मंत्री अमित शाह होर 2 दिन दे दौरे लेई कल रातीं पुणे पुज्जे- ओह कल पुणे च आयोजित इक समारोह च राश्ट्रीय सुरक्षा सलाहकार अजीत डोभाल होरें'गी लोकमान्य तिलक स्मृति राश्ट्रीय पुरस्कार प्रदान करडन। अज्ज स्वतंत्रता सेनानी लोकमान्य बाल गंगाधर तिलक हुंदी पुण्यतीथि ते समाज सुधारक अन्नाभाऊ साठे हुंदी जयंति ऐ। सम्मान समारोह मगरा अमित शाह होर अन्नाभाऊ साठे हुंदे स्मारक पर पुशपांजलि बी भेंट करडन।

<><><><><><>

EAM-Iranian Counter Parl

विदेश मंत्री डाक्टर एस.जयशंकर होरें कल संजा ईरान दे विदेश मंत्री अब्बास अराघची हुंदे कन्नै फोन पर गल्ल करिए पश्चिम एशिया क्षेत्र च जारी तनाव पर चिंता जाहिर कीती। डाक्टर जयशंकर होरें कुसै बी परिस्थिति च वाणिज्यिक ज्हाजें ते नाविकें पर हमलें नैई होन देने दा आग्रह कीता। उ'नें आखेआ जे भारत कुसै बी पक्ख आस्सेआ कीते गेदे ऐसे कुसै बी हमले दी निंदेआ करदा ऐ। विदेशमंत्री होरें सोशल मीडाय पोस्ट च दस्सेआ जे उ'नें चला रदे घटनाक्रम ते चर्चाएं दे सरबंधें च ईरान दे नजरिएं कन्नै बी अवगत करोआया। उ'नें आखेआ जे भारत म्हेशा संवाद ते कूटनीति दा समर्थक रेआ ऐ।

<><><><><><>

Terror Attack Kulgam

कश्मीर दे कुलगाम जिले दे केल्लाम इलाके च कल आतंकवादियें आसेआ कीते गेदे हमले च इक गैर-मकामी कम्मगार दी मौत ते इक होर जखमी होई गेआ। हमले दे तुरत मगरा दौने कम्मगारें गी नेड़े दे अस्पताल पुजाया गेआ, जित्थे उन्दे चा इक नै इलाज दरान दम त्रोड़ी दिता। जखमी होए दे दुए श्रमिक गी माहिराना इलाज लेई अनंतनाग आले सरकारी मैडिकल कालेज अस्पताल च भर्ती करी दिता गेआ ऐ।

तोंआई लैफ्टिनेंट गवर्नर मनोज सिन्हा होरें श्रमिकें पर होए दे इस वैहशियाना आतंकी हमले दी स्ख्त निंदेआ कीती ऐ। उ'ने जम्मू-कश्मीर पुलसा दे डरैक्टर जनरल ते होरनें वरिष्ठ सुरक्षा अधिकारिएं कन्ने गल्लबात करियै उनें'गी आतंकवाद रोधी अभियान होर तेज करने दे निर्देश दिते। एल.जी होरें सोगी परोआर कन्ने हमदर्दी जतांदे होई जखमी श्रमिक दे तौले नरोए होने दी कामना कीती।

<><><><><><>

CWG

भारत नै ग्लासगो च चला'रदे राष्ट्रमंडल खड्डें च कल इक होर शानदार प्रदर्शन कीता। भारत नै जूडो च 2 ऐतिहासिक सुन्ने दे तगमे जिते। मर्दे दे नेजा सुट्टने आहले मुकाबले च यादगार डबल पोजियम फिनिश हासल कीती ते 10 मुक्केबाजें अपने-अपने मुकाबले दे फाईनल च थाहर बनाई।

<><><><><><>

Prez- Bronze Decathlon

राष्ट्रपति द्रौपदी मुरमू होरें राष्ट्रमंडल खेड्ड च डेकाथलॉन मुकाबले च कैंस दा तगमा जितने पर एथलीट तेजस्विन शंकर होरें'गी बधाई दिती ऐ। सोशल मीडिया दी इक पोस्ट च राष्ट्रपति होरें आखेआ जे तेजस्विन शंकर डेकाथलॉन च तगमा जितने आहले पैहले भारतीय खडारी बनी गे न जेड़ी जे इक ऐतिहासिक उपलब्धी ऐ।



IMD-Weather

मौसम विभाग नै अज्ज पूर्वी राजस्थान/ मध्य महाराष्ट्र तटीय कर्नाटक/ दक्खण आंतरिक कर्नाटक/ कोंकण/ गोवा/ केरल ते माहे च मौलाधार बरखा दा अनुमान जाहिर कीता ऐ। हिमाचल प्रदेश/ उत्तराखंड/ पंजाब/ हरियाणा/ चंडीगढ़/ दिल्ली/ पश्चिमी राजस्थान/ बिहार/ पश्चिम बंगाल दे तराई आहले क्षेत्र/ अंडमान ते निकोबार द्वीप समूह/ लक्षद्वीप ते पूर्वोत्तर भारत दे किश हिस्से च बी तेज बरखा होई सकदी ऐ।

